

COMUNICATO n. 100 del 20/01/2025

Manà fora su Trentino Tv l program l vegn endrezà dal Comun General de Fascia

“Pedies”: l é fora la puntata #469 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata 469.

I argomenc de chesta setemèna l é: “Jent de Fascia”, la puntata la pea via co la scomenzadiva editorièla e teatrèla metuda a jir dal Istitut Cultural Ladin “Majon di Fascegn” che oramai la è doventèda n apuntament anual n muie spetà da duta la jent. Col didament de la bibliotechèra Alberta Rossi l report l porta dant duta 4 la publicacions de la regoeta “Jent de Fascia” con aspec e fac che revèrda i desvalives protagonis; la garejèdes de telemark state sul Jouv de Ciareja ai 15 e ai 16 de jené les à vedù na bona partezipazion de spatadores apede che de atlec. Chesta garejèdes defat les perveit desvaliva disciplines desche l slalom, i sauc, utèdes paraboliches a 360° che soscedea gran curiosità; “L Itiosaur de Secèda” chest l é l titol de na publicazion neva dedichèda a chest animèl presistorich che l vivea tel mèr de la Dolomites acà 241 milions de egn. Se trata de na coedizion anter l Museum de Gherdena e l Istitut Cultural Micurà de Rù. L test, scrit te 3 lengac ladin, todesch e talian, l met dant a na maniera scientifica aspec leé a la geologia e a la paleontologia del raion dolomitich olache l è stat troà i fossii del Itiosaur; l Zenter de Paslonch de Alochet l é n lech belebon cognosciù per chi che fèsc chest sport. Chest zenter, apede l Jouv de Sèn Pelegrin, l sporc desvaliva possiblitàes per chi che ge pièsc l paslonch te n ambient che tol l fià e che l ge somea a chi lesc del nord de la Scandinavia. L batiportoës Michele Defrancesco e l maester de schi Andrea Desilvestro i conta de la natura e di portoës e ence de vèlch aspet particulèr del lech.

I report de chesta setemèna, enjigné da Riccardo Zanoner, Angela Pederiva e Sabrina Riz, i vegn porté dant da la ousc de Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

Se pel veder i servijes un a un su la piata Facebook de TV Ladina:

<https://www.facebook.com/TelevizionLadina>

Traduzion di Servijes Linguistics e Culturèi del Comun general de Fascia

(cdt)

